



An Bhruiséal, 27 Bealtaine 2016
(OR. en)

9526/16

RECH 208
TELECOM 100

TORADH NA nIMEACHTAÍ

ó: Ardrúnaíocht na Comhairle

chuig: na toscaireachtaí

Uimh. an doic. 8791/16 RECH 133 TELECOM 74
roimhe seo:

Ábhar: An t-aistriú i dtreo Córas Eolaíochta Oscailte
Conclúidí ón gComhairle (arna nglacadh ar an 27/05/2016)

San Iarscríbhinn, gheobhaidh na toscaireachtaí na conclúidí ón gComhairle maidir leis an aistriú i dtreo Córas Eolaíochta Oscailte, a ghlac an Chomhairle ag an 3470ú cruinniú a bhí aici ar an 27 Bealtaine 2016.

**DRÉACHT-CHONCLUÍDÍ ÓN gCOMHAIRLE MAIDIR LEIS AN AISTRIÚ I dTreo
CÓRAS EOLAÍOCHTA OSCAILTE**

FÓGRAÍONN COMHAIRLE AN AONTAIS EORPAIGH AN MÉID SEO A LEANAS

AG MEABHRÚ DI

- an Moladh ón gCoimisiún an 17ú Iúil 2012 maidir le "Rochtain ar fhaisnéis eolaíoch agus caomhnú na faisnéise sin"¹ agus Teachtaireacht an 17ú Iúil 2012 dar teideal "I dtreo rochtain níos fearr ar fhaisnéis eolaíoch: breisluach a chur le hinfheistíochtaí poiblí sa taighde"²;
- na prionsabail ghinearálta faoi Fhís 2020³, trína n-áirithítear rochtain oscailte ar fhoilseacháin eolaíochta agus trína gcuirtear rochtain oscailte ar shonraí taighde chun cinn i dtaighde a mhaoinítear ó chistí poiblí ar leibhéal an Aontais;
- Tuarascáil mhí Feabhra 2015 ón gCoimisiún dar teideal "Bailíochtú na dtorthaí ón gcomhairliúchán poiblí maidir le hEolaíocht 2.0: Athrú san Eolaíocht"⁴;
- An Teachtaireacht ón gCoimisiún an 6 Bealtaine 2015 i ndáil le "Straitéis maidir le margadh aonair digiteach don Eoraip"⁵ ina n-aithnítear a thábhachtaí agus atá eolaíocht agus taighde ó thaobh dlús a chur leis an nuálaíocht, go suntasach trí mheán na spríce atá sa straitéis feabhas a chur ar choinníollacha an chreata don eolaíocht shonraíbhunaithe;

¹ 12846/12.

² 12847/12.

³ Rialachán (AE) Uimh. 1291/2013 ó Pharlaimint na hEorpa agus ón gComhairle an 11 Nollaig 2013 lena mbunaítear Fís 2020 - An Creatchlár um Thaighde agus Nuálaíocht (2014-2020).

⁴ Tá an tuarascáil ar fáil ag:

http://ec.europa.eu/research/consultations/science-2.0/science_2_0_final_report.pdf#view=fit&pagemode=none

⁵ 8672/15.

- na Conclúidí uithi an 29 Bealtaine 2015 maidir le "Treochlár an Limistéir Eorpaigh Taighde 2015-2020"⁶, lena nglactar Treochlár an Limistéir Eorpaigh Taighde (LET) agus ina leagtar béim ar a thábhachtaí atá sé tús a chur faoi lár-2016 le cur chun feidhme na bpríomhthosaíochtaí gníomhaíochta a saináithníodh sa Treochlár, lena n-áirítear tosaíocht 5 "Cúrsaíocht optamach eolais";
- na Conclúidí uithi an 29 Bealtaine 2015 maidir le "Taighde oscailte, sonraí-shaothraithe agus líonraithe mar spreagadh do nuálaíocht a bheidh níos gasta agus níos leithne"⁷, ina léirítear tacaíocht pholaitiúil leis na coinníollacha cearta creata a leagan amach don taighde agus don nuálaíocht, lena ndírítear ar mhórshonraí agus ar slabhra luacha na sonraí san Eoraip a neartú ina iomláine.

An Eolaíocht Oscailte

1. AITHNÍONN SÍ go bhfuil an fás an-sciobtha a tháinig ar shonraí, infhaighteacht na dteicneolaíochtaí digiteacha atá ag éirí níos cumhachtaí, domhandú an chomhphobail eolaíochta, agus an t-éileamh méadaitheach ón tsochaí dul i ngleic le dúshláin shochoaíochta ár linne, mar bhonn d'aistriú leanúnach agus d'oscailteacht na heolaíochta agus an taighde, dá dtagraítear 'an eolaíocht oscailte' a bhfuil tionchar aici ar an mbealach ina ndéantar taighde agus ina n-eagraítear eolaíocht.
2. AITHNÍONN SÍ go bhféadfaí, leis an eolaíocht oscailte, cáilíocht, tionchar agus tairbhí na heolaíochta a mhéadú agus dlús a chur le cur chun cinn an eolais trína dhéanamh níos iontaofa, níos éifeachtúla agus níos cruinne, níos intuigthe ag an sochaí agus níos freagrúla ó thaobh dúshláin shochoaíochta, agus go bhféadfaí fás agus nuálaíocht a chumasú léi má úsáideann na geallsealbhóirí uile ar gach leibhéal den tsochaí na torthaí eolaíochta arís, agus go bhféadfar, sa deireadh thiar, cur le fás agus le hiomaíochas na hEorpa.

⁶ 8975/15.

⁷ 9360/15.

3. CUIREANN SÍ i bhFÁTH go dtuigtear leis an eolaíocht oscailte, i measc nithe eile, go mbeidh rochtain oscailte ar fhoilseacháin eolaíochta agus go ndéanfar sonraí taighde a athúsáid ar an mbealach is fearr, chomh maith le heolaíocht na saoránach agus ionracas taighde; TUGANN SÍ DÁ HAIRE go bhfuil sé ríthábhachtach ó thaobh fhorbairt na heolaíochta oscailte go dtabharfaí rochtain oscailte ar fhoilseacháin eolaíochta agus go ndéanfaí sonraí taighde a athúsáid ar an mbealach is fearr; TUGANN SÍ DÁ HAIRE an tuairim ón gcoiste um an Limistéar Eorpach Taighde (CLET) maidir le "Sonraí Taighde Oscailte"⁸, agus Glao Amstardam ar ghníomhú a eisíodh an tráth a tionóladh Comhdháil Uachtaránachta na hÍsiltíre maidir leis an Eolaíocht Oscailte⁹ agus na tionscnaimh éagsúla atá á saothrú ag na Ballstáit, ag an gCoimisiún agus ag geallsealbhóirí¹⁰; IARRANN SÍ ar Bhuanmheitheal CLET maidir leis an Eolaíocht Oscailte agus an Nuálaíocht measúnú a dhéanamh ar na gníomhaíochtaí a bheartaítear i ndáil le Glao Amstardam ar ghníomhú ó thaobh indéantacht, éifeachtúlacht agus ord tosaíochta, agus tuarascáil a thabhairt ina leith sin; LEAGANN SÍ BÉIM ar a riachtanaí atá gníomhaíocht chomhbheartaithe ó na rannpháirtithe uile lena mbaineann: an Coimisiún, na Ballstáit, an tsochaí shibhialta agus na geallsealbhóirí¹¹.

An tArdán don Bheartas Eolaíochta Oscailte agus don Chlár Oibre Eorpach maidir leis an Eolaíocht Oscailte

4. TUGANN SÍ DÁ HAIRE gur bhunaigh an Coimisiún an t-ardán¹² don bheartas eolaíochta oscailte lena ndírítear ar thacú le níos mó forbartha a dhéanamh ar an mbeartas Eorpach maidir leis an eolaíocht oscailte agus lena spreagtar na geallsealbhóirí cloí le dea-chleachtais, lena n-áirítear córais luaíochta agus meastóireachta, modhanna malartacha maidir le rochtain oscailte ar fhoilseacháin agus bainistiú ar shonraí taighde (cartlannú san áireamh), méadracht mhalartach, treoirphrionsabail chun go ndéanfar na sonraí taighde a athúsáid ar an mbealach is fearr, caighdeán a fhorbairt agus a úsáid, agus gnéithe eile den eolaíocht oscailte amhail ionracas taighde a chothú agus eolaíocht na saoránach a fhorbairt; IARRANN SÍ ar an gCoimisiún eolas a thabhairt do na Ballstáit agus do na geallsealbhóirí ar bhonn rialta faoi na forbairtí leanúnacha agus na haschuir ón Ardán Don Bheartas Eolaíochta Oscailte ar a laghad dhá uair sa bhliain.

⁸ CLET 1202/16.

⁹ Comhdháil Uachtaránachta na hÍsiltíre maidir leis an Eolaíocht Oscailte - Ó Fhís go Gníomh, Amstardam, 4-5 Aibreán 2016.

¹⁰ E.g. cláir oibre agus beartais maidir leis an eolaíocht oscailte a fhorbairt ar an leibhéal náisiúnta.

¹¹ Áirítear taighdeoirí (ollscoileanna, eagraíochtaí taighde agus teicneolaíochta, fiontair) eagraíochtaí maoiniúcháin, foilsitheoirí agus eagraíochtaí seirbhísí ar na geallsealbhóirí.

¹² <http://ec.europa.eu/research/openscience/index.cfm?pg=open-science-policy-platform>

5. IARRANN SÍ ar an gCoimisiún, i gcomhar leis an ardán don bheartas eolaíochta oscailte agus i ndlúthchomhar leis na Ballstáit agus leis na geallsealbhóirí, agus aird á tabhairt ar na tionscnaimh atá ann faoi láthair le breis forbartha a dhéanamh ar an gelár oibre maidir leis an eolaíocht oscailte, leas éifeachtach a bhaint as an eolas uile a d'fhéadfadh a bheith ann ó ghníomhaíochtaí na heolaíochta oscailte, d'fhonn méadú breise a dhéanamh ar an tionchar atá ag an eolaíocht ar an tsochaí i gcoitinne, agus aghaidh a thabhairt ar na ceanglais maidir le hoiliúint TFC agus scileanna sonraí, go háirithe scileanna gairmiúla bainistithe sonraí, lena gcabhraítear rochtain a thabhairt do shaoránaigh ar thorthaí na taighde.

Bacainní a bhaint agus dreasachtaí a spreagadh

6. AONTAÍONN SÍ gur cheart na torthaí ó thaighde a mhaoinítear ó chistí poiblí a chur ar fáil ar bhealach chomh hoscailte agus is féidir agus AITHNÍONN SÍ gur cheart bacainní dlíthiúla, eagraíochtúla agus airgeadais nach bhfuil gá leo maidir le rochtain ar thaighde a mhaoinítear ó chistí poiblí a bhaint, a mhéid agus is féidir agus mar is iomchuí, d'fhonn eolas a roinnt ar an mbealach is fearr, agus aird á tabhairt ar an ngá atá ann úsáid a bhaint as na torthaí nuair a chaithfear sin a dhéanamh; MOLANN SÍ don Choimisiún agus do na Ballstáit tuilleadh teagmhála a dhéanamh le tríú tíortha d'fhonn dlús a chur leis an bpróiseas aistrithe i dtreo na heolaíochta oscailte agus d'fhonn comhshochair a áirithiú maidir le rochtain oscailte ar fhoilseacháin eolaíochta agus na sonraí taighde a athúsáid ar an mbealach is fearr i gcomhthéacs domhanda.

7. MEASANN SÍ gur cheart cáilíocht na heolaíochta a mheasúnú bunaithe ar an obair féin agus gur cheart sin a leathnú chun go n-áireofaí measúnú ar thionchar na heolaíochta ar an tsochaí i gcoitinne, cé go bhfuil an bhéim a leagan faoi láthair ar tháscairí bunaithe ar thionchar a ghabhann le líon na n-uaireanta a luaitear an taighde in irisí agus i bhfoilseacháin. MOLANN SÍ don Choimisiún, do na Ballstáit agus do gheallsealbhóirí tuilleadh forbartha a dhéanamh i ndáil le tionscnaimh agus iad a chur chun fheidhme tuilleadh, ar bhealach comhordaithe, le cáilíocht a dhearbhu ar bhealach níos fearr ina gcórais athbhreithnithe agus meastóireachta. CUIREANN SÍ i bhFÁTH go gcaithfear sásraí dreasachta a chur ar bun chun luaíocht a thabhairt do thaighdeoirí (agus do gheallsealbhóirí taighde) as torthaí a dtaighde a chur ar fáil chun go bhféadfar úsáid a bhaint astu arís; IARRANN SÍ ar an gCoimisiún, ar an ardán don bheartas eolaíochta oscailte, ar na Ballstáit agus ar na geallsealbhóirí féachaint an bhféadfaí sásraí a bhunú, gníomhaíochtaí oiliúna agus ardú feasachta san áireamh, chun go n-athrófaí an bealach ina ndéantar an eolaíocht. MOLANN SÍ don Choimisiún, tríd an ardán don bheartas eolaíochta oscailte, comhoibriú leis an obair, go háirithe i gcás dreasachtaí do chóras luaite sonraí, a mbeadh glacadh idirnáisiúnta leis, agus leas a bhaint as na tionscnaimh agus an saineolas atá ar fáil cheana.
8. IS DÍOL SÁSAIMH DI an Teachtaireacht ón gCoimisiún ón 9 Nollaig 2015 "I dtreo creat cóipchirt níos nua-aimseartha agus níos Eorpaí"¹³ agus tá sí AG SÚIL leis na tograí reachtacha ón gCoimisiún a fógraíodh inti; Cuireann sí i bhFÍOS GO LÁIDIR an tábhacht a bhaineann le feabhas a chur ar iomaíochas an Aontais agus ar a cheannaireacht in earnáil na heolaíochta agus na teicneolaíochta, faoina bhféadfaí a chuimsiú go gceadófaí d'eagraíochtaí taighde i leas an phobail mianadóireacht téacs agus sonraí a dhéanamh ar ábhar, ar a bhfuil rochtain dhlíthiúil acu cheana féin, chun críocha taighde eolaíochta; CUIREANN SÍ IN IÚL GO LÁIDIR an gá atá ann go leanfaidh an Coimisiún agus na Ballstáit dá dtacaíocht chun deis a thabhairt do gach comhlacht agus eagraíocht, lena n-áirítear saoránaigh, eolaithe agus gnólachtaí agus fiontair bheaga agus mheánmhéide (FBManna), teacht i dtír ar thaighde a mhaoinítear ó chistí poiblí a bhfuil rochtain dhlíthiúil acu air cheana.
9. CREIDEANN SÍ gur féidir feabhas a chur ar rochtain agus scothúsáid torthaí na heolaíochta má choimeádann taighdeoirí nó a bhfostóirí cóipcheart a saothar eolaíochta; IARRANN sí ar an gCoimisiún agus ar na Ballstáit féachaint ar na féidearthachtaí dlí chun bearta a dhéanamh i ndáil leis an méid sin agus an úsáid a bhaintear as na samhlacha ceadúnúcháin, amhail Creative Commons, a chur chun i gcás foilseacháin eolaíochta agus tacair sonraí taighde.

¹³ 15264/15.

Rochtain oscailte ar fhoilseacháin eolaíochta

10. IS DÍOL SÁSAIMH DI rochtain oscailte ar fhoilseacháin eolaíochta¹⁴ mar rogha réamhshocráithe chun torthaí taighde a mhaoinítear ó chistí poiblí a fhoilsiú; AITHNÍONN SÍ maidir leis an aistriú iomlán i dtreo rochtain oscailte gur cheart go mbunófaí sin ar phrionsabail chomhchoiteanna amhail trédhearcacht, ionracas taighde, praghsáil chothrom agus inmhharthanacht eacnamaíoch; agus IARRANN SÍ ar na Ballstáit, ar an gCoimisiún agus ar na geallsealbhóirí deireadh a chur le bacainní dlí agus airgeadais, agus na bearta is gá a dhéanamh chun go n-éireoidh le cur chun feidhme i ngach ceann de na réimsí eolaíochta, lena n-áirítear bearta sonracha le haghaidh na ndisciplíní sin ina gcuireann constaicí bac ar an dul chun cinn.
11. IARRANN SÍ ar an gCoimisiún bearta a fhorbairt agus a spreagadh chun go gcomhlíonfar a mhéid is féidir na forálacha maidir le rochtain oscailte ar fhoilseacháin eolaíochta faoi Fhís 2020, i gcomhpháirt leis na geallsealbhóirí agus leis na Ballstáit; SPREAGANN SÍ na Ballstáit obair as láimh a chéile leis na geallsealbhóirí chun go ndéanfar amhlaidh ar an leibhéal náisiúnta maidir le taighde a mhaoinítear ó chistí poiblí.

¹⁴ Chun críocha na gConclúidí seo, tuigtear le 'rochtain oscailte ar fhoilseacháin eolaíochta' go mbeidh siad ar fáil saor in aisce agus go poiblí ar an idirlíon, lena gceadófar d'aon úsáideoir téacs iomlán na n-alt sin a léamh, a íoslódáil, a chóipeáil, a dháileadh, a phriontáil, a chuardach nó a nascadh, mar aon le hiad a ransú le haghaidh innéacsaithe, iad a thraschur mar shonraí go bogearraí, nó iad a úsáid le haghaidh críoch ar bith eile atá dlíthiúil, gan bhac airgeadais, dlí ná teicniúil. Is chun smacht a thabhairt d'údair ar shláine a saothar agus chun a gceart a choimeád go ndéanfaí iad a aithint agus a lua go cuí amháin ba cheart srian a chur ar atáirgeadh agus ar dháileadh, agus is é sin an t-aon ról amháin a bheadh ag an gcóipcheart sa réimse seo (príomhfhoinsé: Budapest Open Access Initiative, 2002, ar fáil ag: <http://www.budapestopenaccessinitiative.org/read>).

12. AONTAÍONN SÍ go gcuirfidh sí príomhshruthú na rochtana oscailte ar fhoilseacháin eolaíochta chun cinn tuilleadh trí leanúint de thacaíocht a thabhairt d'aistriú go dtí rochtain oscailte láithreach mar réamhshocrú faoi 2020, lena mbainfear úsáid as na modhanna éagsúla atá ar fáil agus sin a dhéanamh ar bhealach a bheidh éifeachtach ó thaobh costais de, gan toirmisc nó leis na toirmisc is giorra is féidir, agus gan bhac airgeadais ná dlí, lena gcuirfí san áireamh éagsúlacht sna córais taighde agus sna disciplíní, agus gur cheart go mbainfear amach an rochtain oscailte ar fhoilseacháin eolaíochta agus lánurraim á tabhairt don phrionsabal nach gcuirfí cosc ar aon taighdeoir a s(h)aothar a fhoilsiú; IARRANN SÍ ar an gCoimisiún, ar na Ballstáit agus ar na geallsealbhóirí ábhartha, lena n-áirítear eagraíochtaí maoinithe taighde, dlús a chur faoin aistriú sin; agus CUIREANN SÍ IN IÚL GO LÁIDIR a thábhachtaí atá soiléireacht i gcomhaontuithe maidir le foilsitheoireacht na heolaíochta.
13. IARRANN SÍ ar na comhpháirtithe uile tabhairt faoi iarrachtaí as láimh a chéile chun an sprioc sin a bhaint amach — le garspriocanna a leagan síos¹⁵ do 2018; IARRANN SÍ ar an gCoimisiún agus ar na Ballstáit dlúthfhaireachán a dhéanamh ar bhonn rialta le linn na tréimhse sin trí na Pointí Náisiúnta Tagartha¹⁶, agus é sin a ailíniú a mhéid is féidir leis an bhfaireachán a dhéantar ar dhul chun cinn LET; IARRANN SÍ ar an gCoimisiún tacú leis na Ballstáit agus leis na geallsealbhóirí saineolas a bhailiú agus comhroinnt na faisnéise a éascú, i. trí bhíthin tionscadal arna maoiniú ag an Aontas chuige sin.

Scoth-athúsáid na sonraí taighde

14. CUIREANN SÍ I bhFIOS GO LÁIDIR maidir le sonraí taighde ó thionscadail taighde a mhaoinítear ó chistí poiblí go bhféadfai iad a mheas mar leas poiblí, agus SPREAGANN SÍ na Ballstáit, an Coimisiún agus na geallsealbhóirí scoth-athúsáid a bhaint as sonraí taighde a leagan síos mar chéim tosaigh, agus na riachtanais á n-aithint san am céanna le haghaidh córais éagsúla rochtana i ngeall ar Chearta Maoine Intleachtúla, cosaint sonraí pearsanta agus rúndacht, imní faoin tslándáil, chomh maith le hiomaíochas eacnamaíoch domhanda agus leasanna dlisteanacha eile. Dá bharr sin, is é seo a leanas an prionsabal foluiteach ba cheart a bheith ag baint le scoth-athúsáid a bhaint as sonraí taighde: "A oscailte is féidir, a iata is gá".

¹⁵ Leis an ngarsprioc sin, cumhdaítear an Rochtain Oscailte, idir Órga, Hibrídeach agus Ghlas.

¹⁶ Dá bhforáiltear leis an Moladh ón gCoimisiún an 17 Iúil 2012 maidir le "Rochtain ar fhaisnéis eolaíoch agus caomhnú na faisnéise sin" (12846/12).

15. IS DÍOL SÁSAIMH DI go bhfuil sé beartaithe ag an gCoimisiún na sonraí taighde uile a thairgtear leis an gclár Fís 2020 a chur ar fáil go hoscailte mar réamhshocrú¹⁷, agus an ceart á aithint ag an am céanna go bhféadfaí éirí as sin a dhéanamh ar chúiseanna amhail Cearta Maoine Intleachtúla, cosaint sonraí pearsanta agus rúndacht, imní faoin tslándáil, agus leasanna dlisteanacha eile; IARRANN SÍ ar an gCoimisiún maoirseacht na sonraí a chur chun cinn - lena n-áirítear gníomhaíochtaí oiliúna agus méadaithe feasachta - agus Pleananna Bainistithe Sonraí a chur chun feidhme mar chuid lárnach de phróiseas an taighde agus leanúint de na costais a thabhaítear maidir le sonraí a bhainistiú agus maidir le sonraí taighde a ullmhú a dhéanamh incháilithe do mhaoiniú faoi Fhís 2020; SPREAGANN SÍ na Ballstáit agus na geallsealbhóirí straitéisí a leagan amach dá réir sin agus úsáid Phleananna Bainistithe Sonraí a chur chun feidhme mar ghnáthchleachtas eolaíochta ina gcuid clár náisiúnta taighde.
16. CUIREANN SÍ I bhFIOS GO LÁIDIR nach féidir teacht i dtír ar na deiseanna chun scoth-athúsáid a bhaint as sonraí taighde ach amháin má bhíonn na sonraí comhsheasmhach le prionsabail FAIR (infhaighte, inrochtana, idir-oibríteach agus inathúsáidte) i dtimpeallacht atá slán-daingean agus iontaofa; MEABHRAÍONN SÍ an tábhacht a bhaineann le stóráil, le caomhnú fadtéarmach agus le coimeádaíocht a dhéanamh ar shonraí taighde, lena gcuirtear san áireamh cumas an ghrúpa nó na heagraíochta a dhéanann an taighde, agus a chinntiú freisin gur ann do mheiteashonraí atá bunaithe ar chaighdeáin idirnáisiúnta; SPREAGANN SÍ na Ballstáit, an Coimisiún agus na geallsealbhóirí na prionsabail FAIR a leanúint i gcláir thaighde agus sásraí maoinithe.

¹⁷ Teachtaireacht ón gCoimisiún an 19 Aibreán 2016 maidir le "Tionscnamh Eorpach Néalríomhaireachta - Geilleagar iomaíoch sonraí agus eolais a fhorbairt san Eoraip".

17. TUGANN SÍ DÁ HAIRE an Teachtaireacht ón gCoimisiún an 19 Aibreán 2016 maidir le "Tionscnamh Eorpach Néalríomhaireachta - Geilleagar iomaíoch sonraí agus eolais a fhorbairt san Eoraip"¹⁸ agus AITHNÍONN SÍ go bhféadfadh an Eoraip tairbhe a bhaint as Néal Eolaíochta Oscailte Eorpach¹⁹ lena gcumasaítear, i measc rudaí eile, stóráil slán fhadtéarmach, anailís éifeachtúil agus (ath)úsáid soláimhsithe, thar teorainneacha agus thar disciplíní a bhaint as sonraí taighde; IARRANN SÍ ar an gCoimisiún, i gcomhar leis na Ballstáit agus leis na geallsealbhóirí, na creataí iomchuí rialachais agus maoinithe a fhiosrú, lena gcuirfí san áireamh na tionscadail atá ann faoi láthair agus an inbhuanaitheacht a bhaineann leo ar bhonn cothrom uile-Eorpach.

Obair leantach

18. IARRANN SÍ ar an gCoimisiún, ar na Ballstáit agus ar na geallsealbhóirí na bearta is gá a dhéanamh chun an eolaíocht oscailte a chur i gcrích agus chun tacú leis an ngá le gníomhaíochtaí comhbheartaithe i bhfóraim ábhartha ar an leibhéal náisiúnta, ar leibhéal an Aontais, ar leibhéal iltaobhach agus go hidirnáisiúnta; IARRANN SÍ ar an gCoimisiún na Ballstáit a choinneáil ar an eolas agus a choinneáil rannpháirteach san obair ar an Ardán do Bheartas Eolaíochta Oscailte, agus AONTAÍONN SÍ go mbreithneoidh sí an dul chun cinn i gcomhar leis an gCoimisiún agus leis an Ardán ar bhonn rialta, ag tosú tráth nach déanaí ná bliain ón am seo.

¹⁸ 8099/16.

¹⁹ Leis an Néal Eolaíochta Oscailte Eorpach, déanfar na bonneagair reatha maidir le sonraí eolaíoch a chónascadh, bonneagair atá scaipthe thar disciplíní agus thar Ballstáit faoi láthair